

# Suliffissarsiortunut ikiorsiissutit pillugit Inatsisartut inatsisaat pillugu Namminersorlutik Oqartussat inatsimmik nalunaarutaat

Matumuuna suliffissarsiortunut ikiorsiissutit pillugit Inatsisartut inatsisaat, Inatsisartut inatsisaat nr. 25, 25. november 2022-meersumi, Inatsisartut inatsisaat nr. 32, 13. juni 2023-meersumi aamma Inatsisartut inatsisaat nr. 71, 20. november 2023-meersumi allannguutit ilanngullugit, nalunaarutigineqarpoq.

## Kapitali 1

### *Atuuffa*

§ 1. Inatsisartut inatsisaanni uani pineqarput inuit suliffissaaleqisut sulilernissaminut piareersimasut.

*Imm. 2.* Suliffissaaleqisutut sulileriaannaasutut isigineqassaaq inuk suliffeqalernissaminut piareersimasoq, siumoortumillu immikkut suliniuteqarfigineqaqqaarani sapaatip akunneranut minnerpaamik akunnerni 20-ini suliffeqalersinnaasoq.

*Imm. 3.* Suliffissarsiortunut ikiorsiissutit aningaasarsiatigut nammineq pisuussutiginnisamik isertitaqannginnermut taartisiatut akilerneqartarput, tamatumani aamma angerlartitaagallarnermi, napparsimanermi aammalu pinngortitami ajunaarnersuaqarnerani.

*Imm. 4.* Naalakkersuisut ersarinnerusunik tulluarsaqatigiinnut immikkoortitserisarnerit pillugit malittarisassiorsinnaapput.

§ 2. Inatsisartut inatsisaanni matumani pineqanngillat inuit namminersortutut inuussutissarsiuteqartut.

*Imm. 2.* Inatsisartut inatsisaanni matumani pineqanngillat inuit pinerluttaalisitsinermut atatillugu imaluunniit isumaginnittoqarfimmit inissiisarfinnut inissinneqarsimasut.

§ 3. Suliffissarsiortunut ikiorsiissutisinissamut pisinnaatitaaneq atorunnaassaaq aningaasarsiatigut isertitaqannginneq pisortani inatsisinik imaluunniit namminersortunut inatsisinik tunngaveqartumik, tamatumani aamma isumaqatigiissutisigut, sillimmasiinernik imaluunniit sulitilluni ajoqusersinnaanermut sillimmasersimanermik tunngaveqartunik isertitaqannginneq matussuserneqartarpat.

## Kapitali 2

### *Angerlartitsineq*

§ 4. Angerlartitsinertut paasineqassaaq:

1) Sulisitsisup sulianik unititsigallarnera ullut 14-it angullugit sivilissuseqarsinnaasumik, nioqqutissiorneq nioqqutissiassaarunnikkut unitsinneqarpat, maskiinat ajoqusernerisigut, silamik allamilluunniit siumut naatsorsuutigineq ajornartumik peqquteqartumik.

2) Sulisitsisup sulianik unititsigallarnera toqqaannartumik pisortaniit ilitsersorneqarnermik imalunniit peqquneqarnermik tunngaveqarpat.

*Imm. 2.* Sulisitsisoq ingerlaannartumik kommunalbestyrelsimut nalunaarusiussaaq sulisut angerlartinneqarpata, soorluttaaq angerlartitsinermut pissutaasut uppersaaserneqassasut.

*Imm. 3.* Naalakkersuisut malittarisassiorsinnaapput sulisitsisup kommunalbestyrelsimut nalunaarsiortarnissaanut, aamma uppersaasiisarnissaanut angerlartitsinermut atatillugu imm. 2 naapertorlugu.

### **Kapitali 3**

#### *Piumasaqaatit nalinginnaasut*

**§ 5.** Suliffissarsiortunut ikiorsiissutinik pisartagaqarsinnaaneq tunngaveqassaaq pineqartup 18-inik ukioqalereersimaneranik, aalajangersimasumik najugaqartuuneranik aammalu Kalaallit Nunaanni inuit allattorsimaffiannut nalunaarsimaneranik.

*Imm. 2.* Inuit Kalaallit Nunaanni aalajangersimasumik najugaqaratik najuuttut, Kalaallit Nunaannilu inuit allattorsimaffiannut nalunaarsimasut aalajangersimasumik najugaqarfeqaratik, suliffissarsiortunut ikiorsiissutinik pisartagaqarsinnaatitaapput, kalaallinut inuiaqatigiinnut aalajangersimasumik atasuugunik.

### **Kapitali 4**

#### *Sulileriaannaaneq, suliffissarsiorneq aamma nuttarsinnaaneq*

**§ 6.** Suliffissarsiortunut ikiorsiissutinik pisartagaqartoq sukkulluunniit suliartoqquneqarnissamut piareersimasussaavoq, pisussaaffeqarlunilu suliffissamik innersuunneqartumik tigusinissamik, suliffeqalernissamut sungiusaasarnernut neqeroorutigineqartartunut peqataasartussaalluni, allamik ilinniagaqartinneqarsinnaalluni, imaluunniit innersuunneqartumik pikkorissaqqinnermik tiguisussaalluni, kiisalu suliasamik sulisinnaanermut sungiusartinneqarnermut atatillugu tunniunneqartumik tiguisussaalluni.

*Imm. 2.* Suliffissarsiortunut ikiorsiissutinik pisartagaqartut Majoriami suliffissarsiortutut nalunaarsorsimassapput, eqeersimaartumillu peqataasassallutik kommunalbestyrelsimiit neqeroorutigineqartunut sulisinnaanngorsaanernut, pikkorissaqqinnernut, allamik ilinniagaqarnermut aamma tamatumunnga atatillugu sungiusaammik sulisarnermut, kiisalu Majoriamut ataatsimiigiaqquneqartarnerni eqeersimaarlutik peqataasassallutik.

**§ 7.** Suliffissarsiortunut ikiorsiissutinik pisartagaqartoq tamanut ammasumik digitaliusumik aaqqiisummi Naalakkersuisunit innersuussutigineqartumi eqeersimaartutut suliffissarsiortutut nalunaarsoqqanissamut aamma naamassillugu suliaasumik atuuttumillu CV-mik peqassalluni pisussaaffeqarpoq.

*Imm. 2.* Suliffissarsiortunut ikiorsiissutinik pisartagaqartoq minnerpaamik sapaatip akunneranut ataasiarluni nalunaarsortittassaaq, tamanut ammasumik digitaliusumik aaqqiisummi Naalakkersuisunit

innersuussutigineqartumi, tamanut atuuttumik nammineq digitaliusumik ilisarnaatini atorlugu imaluunniit Qitiusumik Ingerlatsivimmi Majoriami nalunaarsortilluni.

*Imm. 3.* Naalakkersuisut piffissaagallartillugu qaqugukkulluunniit tamanut ammasumik digitaliusumik aaqqiissut aamma tamanit iserfigineqarsinnaasoq pillugu paasissutissat kiisalu Kalaallit Nunaanni Qitiusumik Ingerlatsiviit Majoriat pillugit attaveqarnissamut paasissutissat pillugit saqqummiussisassapput.

**§ 8.** Suliffissarsiortunut ikiorsiissutininik pisartagaqartoq suliffissanut inuttaqanngitsunut suliffigissallugu periarfissaqarfigisaminnut qinnuteqartarnissamik pisussaaffeqarpoq.

*Imm. 2.* Suliffissarsiortunut ikiorsiissutininik pisartagaqartoq pisussaavoq suliffissami innersuunneqartumi sulilernissamut, ullormik ataatsimik siumut nalunaarfigineqarnermigut. Oqaaseqatigiit siulliit aamma atuupput suliffissarsiortunut ikiorsiissutininik pisartagaqartumut sulisitsisumiit suliffissamik inuttaqanngitsumik neqeroorfigineqartumut.

**§ 9.** Kommunalbestyrelse qinnuteqartoq peqatigalugu tamakkiisumik isiginnittumik nalilersuisassaaq qanoq annertutigisumik qinnuteqartoq sulisinnaanersoq pillugu, minnerpaamik sapaatip akunneranut akunnerni 20-ini, imaluunniit ilinniakkamik aallartitsilluni, tamatumani aamma siumoortumik suliniuteqartoqarsimanissaa pisariaqartinneqarnersoq.

**§ 10.** Kommunalbestyrelsip suliffissarsiortunut ikiorsiissutininik pisartagaqartoq suleqatigalugu sapaatip akunnerisa 4-at ingerlaneranni suliarissavaa inummut pineqartumut iliuusissanut pilersaarussiaq. Qinnuteqartumik suleqateqarnermi isiginiarneqassapput qinnuteqartup pisariaqartitsineri aamma sunniuteqaqataanissaa akisussaaqataanissaalu, iliuusissamut pilersaarummik suliaqarnermut atatillugu.

*Imm. 2.* Iliuusissanut pilersaarummi piviusorsiortunik anguniakkanik iliuusissanillu nalunaarsuisoqassaaq, siunertaqartunik suliffissarsiortunut ikiorsiissutininik pisartagaqartup ilinniagaqarnissamut periarfissaqarnissaanik, imaluunniit suliassatigut -fagitigut piginnaanngorsaqqinnernik ingerlatsinissaanik, pitsanngorsaasunik ikiorsiissutininik pisartagaqartup ataavartumik suliffeqalernissaanut periarfissanik, kiisalu pisartagaqartup suliffeqarnermut attaveqarneranik nukittorsaasumik.

*Imm. 3.* Iliuusissanut pilersaarummi ilaassapput suliffissarsiortunut ikiorsiissutininik pisartagaqartup inissisimanera tamakkiisoq, tamatumani aamma ilaqutariinni pissutsit, ineqarneq, nappaatit aamma pissutsit allat qinnuteqartup suliffeqalernissamut periarfissaanut sunniuteqarsinnaasut.

*Imm. 4.* Kommunalbestyrelse inuusuttunut 18-29-inik ukiulinnut iliuusissanut pilersaarummik suliaqarnerni pingaartitsisassaaq anguniagassanik aamma iliuusissanik, annertunerpaatigut peqataasinnaasunik qinnuteqartup ilinniagaqarsinnaaneranut, imaluunniit ilinniagaqalernissamut periarfissaanut.

**§ 11.** Kommunalbestyrelsip iliuusissanut pilersaarummi suliffeerunnermi ikiorsiissutininik pisartagaqartoq pisussaaffilissavaa eqeersimaartumik peqataanissaanik, tamatumani aamma oqaloqatigiittarnerni, suliniutini pilersinneqartuni, sulisinnaanermik sungiusartitsinerni, inuttut ineriartortitsiviusunik

pikkorissartitsinerni, suliffisatigut, fagitigut pikkorissartitsinerni aamma suliffissamik innersuunneqartumik tiguisussaananerani.

*Imm. 2.* Pisartagaqartup iliuusissanut pilersaarusiaq isumaqatiginngippagu, imaluunniit iliuusissanut pilersaarusiame pisussaaffliunneqartoq iliuusissaq aalajangersimasooq isumaqatiginngippagu, iliuusissaq pineqartoq taanna Pisortat ingerlatsineranni suliffisat suliarineqartarnerat pillugu Inatsisartut inatsisaat naapertorlugu aalajangiinertut isigineqassaaq.

*Imm. 3.* Suliami peqataasup tusarniarneqartussaananerani piumasaqaat taamaattoq atortinneqartussaassanngilaq pisartagaqartup ulluinnarmik sivilisunerumilluunniit ingerlatassanik pisussaaffilerneqartarnerani isigalugu. Oqaaseqatigiilli suilliit taamaattoq atortinneqassanngillat aalajangiineq § 13, imm. 1 aamma imm. 2 naapertorlugit suliaappat.

**§ 12.** Suliffissarsiortunut ikiorsiissutinik pisartagaqartoq pisussaavoq iliuusissanut pilersaarut naapertorlugu naammassillugulu iliuuseqarnissamut. Iliuusissanut pilersaarut nalilersoqqinneqartassaaq iluarsivigineqartassallunilu pisariaqartitsineq naapertorlugu, minnerpaamik qaammatit pingasukkaartumik.

*Imm. 2.* Iliuusissanut pilersaarummik suliaqartoqartanngilaq inunnut suliffissarsiortnermut ikiorsiissutinik pisartagaqartunut suliffimmiit angerlartinneqarallarnermi, takuuk § 4.

*Imm. 3.* Naalakkersuisut malittarisassiorsinnaapput iliuusissanut pilersaarsiortarnermut, tamatumani aamma suliffissarsiortunut piumasaqaatinik, suliffissanut innersuunneqartunut, sulisinnaanngorsaalluni suliniutinik neqeroorutitut, allamik ilinniagaqartarnernut imaluunniit allatigut pikkorissaqqittarnernut, kiisalu napparsimanermut atatillugu katsorsartinnernut il.il.

**§ 13.** Inuit 18-29-inik ukiullit suliffissarsiortutut nalunaarsorsimasut qaammatini 12-ini, pisussaapput qinnuteqassallutik tiguisissallutillu piffissaq tamaat suliffissamik sumiiffiup angerlarsimaffigisap avataani. Kommunalbestyrelse assigisaanik najukkap angerlarsimaffigisap avataani piffissaq tamaat suliffissamik innersuussisinnaavoq.

*Imm. 2.* Assigisaanik imm. 1 atortinneqassaaq inunnut 30-inik sinnerlugillu ukiulinnut, suliffissarsiortutut nalunaarsorsimareersimasunut qaammatini 24-ini.

*Imm. 3.* Kommunalbestyrelsillu aamma inuk pineqartoq pisussaaffilersinnaavaa, tak. imm. 1 aamma 2, allamik ilinniagaqarnermi peqataasussanngorlugu, sulilernissamut sungiusartitsisarnernut neqeroorutini peqataasussanngorlugu, imaluunniit pikkorissaqqinnissamik allamik innersuussinnaallugu angerlarsimaffigisap avataani, kiisalu pisussaaffilersinnaallugu angerlarsimaffigisap avataani suliffissamik tiguisinissaanik, sungiusaammik sulisitsinertut innersuunneqartumi, allamik ilinniagaqartitsiviusumi imaluunniit pikkorissaqqinnermik neqerooruteqarfiusumi.

*Imm. 4.* Imm. 1 atortinneqassanngilaq periarfissaqanngippat inissamik naleqquttumik suliffissarsiortutut pisartagaqartumut, taassuma aappaanut aamma meeraanut angerlarsimasunut 18-it inorlugit ukiulinnut pissarsiniarneq sumiiffimmi pineqartumi. Imm. 3 atortinneqassanngilaq inissamik naleqquttumik imaluunniit ineqarfissamik naleqquttumik innersuussisoqarsinnaanngippat, suliffissarsiortnermut ikiorsiissutinik pisartagaqartumut.

## Kapitali 5

### Sulinngiffeqarneq

**§ 14.** Inuk qaammatini imminnut atasuni 6-ini suliffissarsiornermut ikiorsiissutininik pisartagaqarsimasooq, pisinnaatitaavoq isumaqatigiissuteqarnikkut sapaatip akunnerini 2-ini sulinngiffeqarsinnaanermut, pineqartup suliffissarsiornermut ikiorsiissutininik pisartagaqarfisinnaasaanik. Sulinngiffeqarneq Majoriamut isumaqatigiissutigineqassaaq, sulinngiffeqalernissaaq sapaatip akunnerinik 4-nik sioqqullugu. Sulinngiffeqarneq ingerlanneqassaaq qaammatit tulluuttut 6-it ingerlaneranni. Inuup sulinngiffeqarnermini naammassisimassavai piimasaqaatit suliffissarsiornermut ikiorsiissutininik pisartagaqartussaananermut, kapitalimi 4-mi sulilernissamut piareersimasussaataaneq taamaallaat pinnagu.

*Imm. 2.* Inuup pineqartup sulinngiffeqarnissani sulinngiffeqarnerisuteqarfiusussaaq pisinnaatitaaffigisimaguniuk, sulinngiffeqarneq taanna siulliullugu ingerlatissavaa. Sulinngiffeqarneq tamarmiusooq sulinngiffeqarnerisuteqarfiusooq aamma suliffissarsiornermut ikiorsiissutininik pisartagaqarfiusooq annerpaamik sapaatip akunnerinik 2-nik sivilissuseqarsinnaavoq.

*Imm. 3.* Inuk suliffissarsiornermut sulinngiffeqartutut nalunaarsortissaaq, tamanut atuuttumik digitaliusumik aaqqiissummi Naalakkersuisunit innersuussutigineqartumi imaluunniit Qitiusumik Ingerlatsivimmi Majoriami nalunaarsortissalluni. Inuk pineqartoq suliffissarsiornermut sulinngiffeqartutut nalunaarsorsimanngikkuni sulilernissamut piareersimasutut isigineqassanngilaq.

## **Kapitali 6**

### *Napparsimaneq*

**§ 15.** Inuk suliffissarsiornermut ikiorsiissutininik pisartagaqarsinnaavoq napparsimanermini, kinguneqarallartumik maannamutut sulileriaannaannginnermik. Napparsimanerup nalaani suliffissarsiornermut ikiorsiissutininik katersisoqarsinnaavoq napparsimanerit ulluisa pingajuanniit, taamaattoq tak. imm. 3. Sulisinnaanerup periarfissaanngikkallanerani nappaammik peqquteqartumik ilassusikkanik suliffissarsiornermut ikiorsiissuteqartitsisoqassaaq.

*Imm. 2.* Inuit imm. 1-imi pineqartunut ilaasut, kapitali 4 naapertorlugu piareersimasussaataanermit pisussaaffeqanngikkallartarput. Ilassusikkanik suliffissarsiornermi tapiissutininik pisartagaqarsimagunik, piareersimasussaataanerit taamaattoq aalajangiusimaneqarsinnaavoq.

*Imm. 3.* Napparsimaneq sap. ak. 2-nik sivilunerumilluunniit sivilissuseqarpat suliffissarsiornermut ikiorsiissutininik katersineq napparsimanerit ulluisa siullianniit aallartissaaq.

*Imm. 4.* Suliffissarsiornermi ikiorsiissutininik napparsimanerup nalaani pisartagaqarsinnaatitaaneq atorunnaartarpoq immiut ataannartunik piffissami qaammatinik 6-inik sinnerlugilluunniit sivilissusilimmi napparsimareernermi. Suliffissarsiornermut ikiorsiissutininik napparsimanerup nalaani pisartagaqarsinnaatitaanerli pigiinnarneqartarpoq suliffissarsiornermut ikiorsiissutininik pisartagaqartinneqartoq piffissap qaammatinik 3-nik sivilissuseqartup iluani naatsorsuutigisinnaappagu peqqissisutut oqaatigineqarsinnaalernissi, maannamutullu suliffeqaleqqissinnaalluni.

**§ 16.** Napparsimaneq kommunalbestyrelsimut nalunaarutigineqassaaq kinguarsaanertaqanngitsumik. Kommunalbestyrelse naliliippat nakorsamiit allagartaq pisariaqartoq, piimasaqartoqarsinnaavoq nakorsamiit uppersaammik. Nakorsamiit allagartami nalunaarneqarsimassaaq napparsimaneq piffissami tamakkiisumi imaluunniit piffissap ilaannaani pisuunersoq, aamma qaqugu pineqartup

nalinginnaasumik suliffissamik tamakkiisumik isumaginnissinnaalernissaa naatsorsuutigineqarnersoq. Nakorsamit allagartamut aningaasartuutit kommunalbestyrelsimiit akilerneqassapput.

## **Kapitali 7**

### *Killilersuiffigisaalerneq*

**§ 17.** Suliffissarsiortunut ikiorsiissutininik pisartagaqartoq sulilernissamut piareersimanngitsoq, tak. §§ 6-13, atorfimminniit soraarniuteqartoq imaluunniit suliffimminniit qimagutitaasut, ikiorsiissutisisinnaanerminniit killilersuiffigisaalertarpoq sapaatip akunnerini 4-ani.

*Imm. 2.* Soraarniuteqarneq tunngavilersorneqarpat sulisitsisup peqqarniitsumik pissusilersorluni atorfeqarnermut atugassarititaasunik unioqqutitsineranik, imm. 1 atuutissanngilaq. Imm. 1 aamma atuutissanngilaq inuup pineqartup eqqartuussinikkut, akerleriissutaasut suliarineqartarfianni aalajangiinikkut, allatigut iliuuseqarnikkut imaluunniit pituttuisuusumik isumaqatigiissuteqarnikkut aalajangiunneqarpat suliffimmiit qimagutitaaneq tunngavissaqanngitsoq. Suliffissarsiortunut ikiorsiissutit utimoortumik tunniunneqassapput, tak. taamaattoq § 3.

*Imm. 3.* Suliffissarsiortunut ikiorsiissutit piffissami killilersuiffigisaasumi ikiorsiissutinit pisinnaatitaaffittut maannamut tunniunneqartartuniit 50 % -iusarput. Suliffissarsiortumut ikiorsiissutininik annikillisisineq kinguneqartanngilaq pisartagaqartup pisussaaffinik Inatsisartut inatsisaat manna naapertorlugu allannguinerneq.

**§ 18.** Suliffissarsiortunut ikiorsiissutininik inuk pisartagaqartoq killilersuiffigisaalersimaguni sisamariarluni, qaammatit 12-it imminnut atasut iluanni, taava pineqartoq sulilernissamut piareersimasutut isigineqarunnaassaaq, suliffissarsiortunullu ikiorsiissutininik tamakkiisunik pisartagaqarsinnaajunnaassalluni. Inuk pineqartoq suliffissarsiortunut ikiorsiissutininik annikillisanik ikiorsiissutisissaaq, tak. § 17, imm. 3, qaammatini 3-ni pisartagaqarsinnaajunnaarnerup qaangiunneranniit, § 17, imm. 1 naapertorlugu.

## **Kapitali 8**

### *Suliffissarsiortunut ikiorsiissutisisinnaanermik katersisarneq*

**§ 19.** Inuit suliffissarsiortunut ikiorsiissutisiassaminnik katersilersarput ullormiit saaffiginniffimminniit, tak. taamaattoq imm. 2 aamma 3.

*Imm. 2.* Inuup ulloq saaffiginniffigisani sap. ak. sioqqullugu aningaasarsiaqarnini annaasimappagu ulloq taanna tunngavigineqassaaq, ulloq saaffiginniffiusoq pinnagu.

*Imm. 3.* Inuit akissarsiaqarfigisaminnik suliffeqareersimanngitsut suliffissarsiortunut ikiorsiissutininik pisartagaqalersinnaanerminnut katersisarput sapaatip akunnerini 2-ni, kommunalbestyrelsimut suliffissarsiortutut nalunaarnerminniit (ulloq saaffiginniffik).

## **Kapitali 9**

### *Suliffissarsiortunut ikiorsiissutit aningaasartaat*

**§ 20.** Suliffissarsiortunut ikiorsiissutit procentiat naatsorsorneqartarpoq sulinermik inuussutissarsiuteqartunut suliamik ilinniagaqarsimanngitsunut isumaqatigiisummi minnerpaamik akunnermusiat aamma sulinermik inuussutissarsiuteqartunut suliamik ilinniagaqarsimasunut akunnermusiat, SIK-ip aamma Naalakkersuisut akornanni isumaqatigiissut naapertorlugu.

*Imm. 2.* Akiliutissap procentia sapaatip akunnerini 26-ini siullerni minnerpaamik akunnermut akissarsiat 90 % -iannik annertussuseqarpoq. Tamatuma kingorna akunnermusianiit procentiat 80 % -imut apparneqassaaq.

*Imm. 3.* Inunnut 18-29-inik ukiulinnut suliffissarsiornermut ikiorsiissutinik pisartagaqartinneqareersimasunut qaammatini 12-ini, akissarsiat minnerpaaffissaannit procentia 65 % -itut annertussuseqalertarpoq.

*Imm. 4.* Inunnut 30-inik ukiulinnut ukioqqortunerusunullu katillugit qaammatini 24-ini suliffissarsiornermut ikiorsiissutinik pisartagaqareersimasunut procentia akunnermusiat 65 %-ianut annertussuseqarpoq.

**§ 21.** Naalakkersuisut quppersakkaminni tamanut takusassiarisassavaat § 20, imm. 1- 4 naapertorlugit akiliutit annertussusissaat.

**§ 22.** Suliffissarsiortunut ikiorsiissutinik tunniussisoqartassaaq qinnuteqartup akunnermusiaanik tunngavilimmik. Akunnermusiaq naatsorsorneqartassaaq qinnuteqartup agguaqatigiissillugit akunnerit sapaatip akunnerini kingullerni 13-ini suliffissarsiortunut ikiorsiissutinik qinnuteqannginnermini suliffigisimasai tunngavigalugit, taamaattoq sapaatip akunneranut minnerpaamik akunnerit 22-it. Annerpaamik suliffissarsiortunut ikiorsiissutinik akiliisoqarsinnaavoq sapaatip akunneranut akunnermusiaq akunnernut 40-nut naatsorsugaasoq tunngavigalugu.

*Imm. 2.* Nalunaaquttap akunnerinut aningaasarsiaqarfusunut ilaatinneqassapput piffissat pineqartup angerlartitaaffigisimasai, tak. § 4, aamma piffissat qinnuteqartup suliffigisimanngisai kisiannili akissarsiaqarfigisimasai imaluunniit allatigut pissarsiffigisimasai, tamatumani aamma sulinngiffeqarneq akilerneqartoq, ullut napparsimaffusut akilerneqartut aamma meeqqap napparsimaffia, pikkorissarnernut peqataaneq, nal. ak. akissarsissutissanik afspadseeriineq assigisaaluunniit.

*Imm. 3.* Inuit sioqqullugu akissarsiorfigisaminnik suliffeqarsimanngitsut suliffissarsiornermut ikiorsiissutinik sapaatip akunneranut akunnernut 22-inut naatsorsugaasunik akilerneqartassapput.

**§ 23.** Siumoortumik qinnuteqarnikkut ilassutitut suliffissarsiornermi ikiorsiissutinik tunniussisoqarsinnaavoq, piffissap ilaannaani suliffeqarnermi annerpaamik sapaatip akunnerinik sisamanik sivilussuseqartuni, piffissap qaammatinik tulleriinnik arfinilinnik sivilussuseqartup iluani.

*Imm. 2.* Ilassutitut suliffissarsiornermi ikiorsiissutit piumasaqaatitaqarput ikiorsiissutinik tiguisussap sulilernissaminut piareersimanissaanik, tak. kapitali 4.

*Imm. 3.* Piffissaq suliffissarsiornermi ilassutitut ikiorsiissutinik pisartagaqarfusoq tiguisussap iliusissanut pilersaarutaani ilaariissaaq, siunertaqassallunilu pineqartup aalajangersimasumik suliffeqalernissaanik.

**§ 24.** Suliffissarsiortunut ikiorsiissutinik pisartagaqartartoq ulluni ataasiakkaani akissarsiortarsimappat, suliffissarsiornermut ikiorsiissutit annikillineqartassapput nalunaaquttap akunnerinik

aningsarsiorfiusunik.

**§ 25.** Suliffissarsiorfiutut ikiorsissutit kingumoorfik tamatigut ullut 14- ikkaarfik akilerneqartassapput. Suliffissarsiornermut ikiorsissutit kommunalbestyrelsimit kommunimi sulinerfik inuussutissarsiorfiutut inuit allattorsimaffianni nalunaarsugaavigisaani akilerneqartassapput.

*Imm. 2.* Kommunit agguarnerisa avataaniittunut inunnut naalakkersuisoqarfik sulisoqarnermut akisussaasuusuk suliffissarsiornermut ikiorsissutitut aningsarsiorfiutit ingerlatsivai, tak. § 30, imm. 2.

## **Kapitali 10**

### *Qanoq sivisutigisumik suliffissarsiorfiutut inissisimaneq*

**§ 26.** Suliffissarsiorfiutut qanoq sivisutigisumik inissisimaneq naatsorsorneqartassaq siullermeersumik suliffissarsiornermi ikiorsissutitik akiliisoqarneraniit, piffissamut suliffissaaleqisup suliffissarsiornermi ikiorsissutitik pisartagaqarunnaarfigisaanut, suliffeqalernerfik pissuteqartumik. Nutaamik suliffissarsiorfiutut kommunalbestyrelsimi nalunaarsorsimaleqqinnermi, suliffissarsiorfiutut nutaamik nalunaartutut nalunaarsorsimalissaq, tak. taamaattoq Imm. 3.

*Imm. 2.* Imm. 1 naapertorlugu qanoq sivisutigisumik suliffissarsiorfiutut naatsorsorneqarnerani ilanngunneqassaq piffissaq ilassutitut suliffissarsiorfiutut ikiorsissutitik akiliuteqarfiusartoq.

*Imm. 3.* Suliffissarsiorfiutut ikiorsissutitik pisartagaqartut nalunaarsimappat suliffissarsiorfiututunnaarluni, taavali sulisapaatip akunneri 12-it qaangiutinngitsut nutaamik suliffissarsiorfiutut kommunalbestyrelsimut nalunaarluni, pineqartut nutaamik nalunaartutut isigineqassanngilaq. Suliffissarsiorfiutut sulisuliffissarsiorfiutut allannguuteqanngitsumik sivissusilittut nalunaarsorsimaannassalluni imm. 1 malillugu.

## **Kapitali 11**

### *Paasissutissiinissamut pisussaaffik*

**§ 27.** Suliffissarsiorfiutut ikiorsissutitik pisartagaqartut pisussaavoq kommunalbestyrelse ilisimatittassallugu atugarisamini allannguutit suliffissarsiornermut ikiorsissutitik pisartagarisamini allannguutaasinnaasut pillugit, atorunnaarsitsisinnaasut imaluunniit utertitsilluni akiliuteqartussanngorsinnaanermut pissutaasinnaasut pillugit.

**§ 28.** Kommunalebestyrelse siuumoorfik qinnuteqartumiit imaluunniit ikiorneqartumiit akuersitsereernikkut piumasaqarsinnaavoq pisortatut oqartussaasut allat pineqartut pillugu paasissutissanik tunniussaqqassat, suliffissarsiorfiutut ikiorsissutitik tunniussisinnaanermut suliap suliarineranut pisariaqarsinnaasunik. Tamanna aamma atuuppoq ilinniartitaanernut ingerlatsivinnut, napparsimavinnut, nakorsanut, tarnip pissusaanik immikkut ilisimasalinnut, peqqinnissamik suliaqartunut akuerisaasunut allanut, aamma inunnut pineqartunut akisussaasunut sinnerlugulu sulisunut, aningaaserivinnut, sulisitsisunut aamma namminersortunut pisortat ingerlatsiviinik sullissisuusunut. Tamannalu aamma atuuppoq paasissutissanut inummut pineqartumut taamaallaat tunngasuusunut atatillugu, aammalu paasissutissanut isortuussaasunut tunngatillugu, soorluttaaq pisortat nakorsap



pineqartumut allattugaataanik, napparsimmaviup allattugaataanik imaluunniit tamakkua anillatsinneqarnerinik piniarsinnaasut.

*Imm. 2.* Kommunalbestyrelsip pineqartumit akuerineqaqqaarani suliami ataatsimi suliamut atatillugu imaluunniit nakkutilliinermut atatillugu piumasarisinnaavai paasissutissat pisortatut oqartussaasunit allaniit, aningaasanut tunngasuni aamma sulinngiffeqartarnermut tunngasuni, pineqartumut ikiorserneqarnissamik qinnuteqartumut atatillugu.

*Imm. 3.* Kommunalbestyrelsip innuttaasumit akuerineqaqqaarani piumasarisinnaavai paasissutissat pisariaqartut aningaasaqarnermut attuumassuteqartut aningaaserivinniit aamma sulisitsisuniit, suliffissarsiortumut ikiorsiissutinik nakkutilliinermut atatillugu.

*Imm. 4.* Qinnuteqartoq akuersinngippat kommunalbestyrelsip paasissutissanik piniarsinnaaneranut imm. 1 naapertorlugu, suliaq paasissutissat pigineqartut tunngavigalugit suliarineqassaaq, paasissutissat pineqartut, tak. imm. 2, akuersissutitaqanngitsumik aaneqarsinnaanngippata.

## **Kapitali 12**

### *Utertitsilluni akiliineq*

**§ 29.** Kommunalbestyrelse aalajangertussaavoq eqqunngitsunik tunngaveqartunik ikiorsiissutinik tunniussisoqarsimanerani, Inatsisartut inatsisaat manna naapertorlugu utertitsilluni akiliinissamik, imaappat, ikiorsiissutinik pisartagaqartoq:

- 1) Kommunalbestyrelsimut paasissutissanik apuussinaveersaarsimappat, tak. § 27.
- 2) Pissutsit nalunngikkaluarlugit Inatsisartut inatsisaat manna naapertorlugu ikiorsiissutinik tigusaqarsimappat.
- 3) Kingusinnerusukkut taarsiissutissanik akiliivigineqarsimappat, ikiorsiissutinik allaniit akilerneqarsimappat assigisaanilluunniit aqqusaagaqarsimappat, piffissami suliffissarsiornermut ikiorsiissutinik pisartagaqarfusimasuni siunertaasunut naapertuuttunik akilerneqarsimasunik.

## **Kapitali 13**

### *Aningaasalersuineq aamma allaffissorneq*

**§ 30.** Kommunalbestyrelsip Inatsisartut inatsisaat una tunngavigalugu suliassanik allaffissornikkut ingerlatsineq isumagisaraa.

*Imm. 2.* Inatsisartut inatsisaat una naapertorlugu ikiorsiissutinik pisartagaqarnissamut qinnuteqaat kommunimi aalajangersimasumik ineqarfigisami, imaluunniit aalajangersimasumik najukkami, tunniunneqassaaq. Inuit kommunit aggorneqarsimanerisa avataani aalajangersimasumik najugaqartut qinnuteqaammik Naalakkersuisunut tunniussisussaapput.

*Imm. 3.* Inunnut nunap kommuninut aggorsimanerisa avataaniittunut Naalakkersuisut piginnaatitsisinnaapput pisortatut oqartussaasunik allanik Inatsisartut inatsisaata matuma atortinneqarneranut atatillugu.

**§ 31.** Inatsisartut inatsisaat manna naapertorlugu aningaasartuutit kommunalbestyrelsimit akilerneqassapput. Aningaasartuutit inunnut § 30, imm. 2, oqaaseqatigiit aappaat naapertorlugu pineqartunut Naalakkersuisunit akilerneqassapput.

*Imm. 2.* Suliffissarsiornermut ikiorsiissutininik pisartagaqartoq kommunimiit nuuppat iliuusissanut pilersaarummik suliaqartoqareernerani, kommunip nuuffiusup iliuusissanut pilersaarusiaq kommunimut qimatamut piniassavaa, naleqqussassallugulu taanna pisariaqassusia naapertorlugu, suliffissarsiornermut ikiorsiissutininik pisartagaqartoq kommunimi nuuffigisamini saaffiginnippat. Kommuni qimanneqartoq iliuusissamut pilersaarummik kommunimut nuuffiusumut nassiussaqaassaaq, tamanna piumasarineqarniariapat.

## **Kapitali 14**

### *Ataatsimoorussanik IT-mi aaqqissuussinerit*

**§ 32.** Kommunit aamma Naalakkersuisut ataatsimoorussaminnik IT-mut atatillugu atortorissaaruteqassapput, Inatsisartut inatsisaat manna tunngavigalugu allaffissornerminni atugassaminnik.

## **Kapitali 15**

### *Naammagittaalliutit*

**§ 33.** Kommunalbestyrelsip Inatsisartut inatsisaat una naapertorlugu aalajangiineri suliaassanngortinneqarsinnaapput Isumaginninnikkut Maalaaruteqartarfimmut, Isumaginnittoqarfup aqunneqarnera aaqqissuussaanelu pillugit Inatsisartut peqqussutaanni aalajangersakkat naapertorlugit.

*Imm. 2.* Kommuninut nunatta aggorneqarnerisa avataanni inunnut aalajangersimasumik najugaqartunut imaluunniit najugaqarallartunut tunngatillugu aalajangernerit Naalakkersuisunit imaluunniit Naalakkersuisunit piginnaatinneqartunit suliarineqartut Isumaginninnermut Maalaaruteqartarfimmut suliaassanngortinneqarsinnaapput.

## **Kapitali 16**

### *Atortuulerner aamma ikaarsaariarnermi aalajangersakkat*

**§ 34.** Inatsisartut inatsisaat una atortuulersinneqarpoq ulloq nalunaarutip kingorna 1. januar imaluunniit 1. juli.

*Imm. 2.* Ilutigisaanik atorunnaarsinneqarpoq Suliffeerunnermi ikiorsiissutit pillugit Inatsisartut inatsisaat nr. 2, 15. maj 2014-imeersoq.

**§ 35.** Inuit Inatsisartut inatsisaata matuma atortuulernerani suliffeerunnermut ikiorsiissutininik pisartagaqartut ingerlaannartumik suliffissarsiornermut ikiorsiissutininut nuutsinneqassapput, Inatsisartut inatsisaanni uani aalajangersakkat naapertorlugit.

*Imm. 2.* Iliuusissanut pilersaarutit atuuttuusut Suliffeerunnermut ikiorsiissutit Inatsisartut inatsisaat nr. 2, ulloq 15. maj 2014-imeersoq naapertorlugu, allannguuteqaratik Inatsisartut inatsisaat una naapertorlugu atortinneqassapput. Kommunalbestyrelse Inatsisartut inatsisaata matuma atortuulerneraniit ukioq ataaseq qaangiutsinnagu iliuusissanut pilersaarutininik nutarteraluni malinnaatitsisassaaq, inunnut

suliffeerunnernut ikiorsiissutininik pisartagaqarsimasunut suliffissarsiornermilu ikiorsiissutininik pisartagaqalersunut.

Inatsisartut inatsisaat nr. 25, 25. november 2022-meersoq (2023-mut ukiumut missingersuusiorfiusumut kommuninut ataatsimoortumik tapiissutit pillugit isumaqatigiissut naapertorlugu atortuulersitsinermut ulluinik ikaarsaarnermilu aalajangersakkanik allanngortitsineq)<sup>[1]</sup> atuutilernissaanik aalajangersakkanik makkuninnga imaqarpoq:

### § 3

Inatsisartut inatsisaat atortuulersinneqassaaq saqqummiunneqarnerata aqaguani.

Inatsisartut inatsisaat nr. 32, 13. juni 2023-meersoq (Atortuulersitsinermut ulluinik aamma ikaarsaarnermi aalajangersakkanik allanngineq)<sup>[2]</sup> atuutilernissaanik aalajangersakkanik makkuninnga imaqarpoq:

### § 3

Inatsisartut inatsisaat atortuulersinneqassaaq saqqummiunneqarnerata aqaguani.

Inatsisartut inatsisaat nr. 71, 20. november 2023-meersoq (Qaagukkulluunniit tamanut ammasumik suliffinnut nittartakkami il.il. suliffisarsiorlutut nalunaarsortinneq)<sup>[3]</sup> atuutilernissaanik aalajangersakkanik makkuninnga imaqarpoq:

### § 2

Inatsisartut inatsisaat una atortuulersoq ulloq 1. januar 2024.

*Isumaginninnermut, Ilaqutariinnut, Suliffeqarnermut Nunamullu Namminermut Naalakkersuisoqarfik, ulloq 6.  
marts 2025*

**Martha Abelsen (atsior.)**  
Naalakkersuisoqarfimmi Pisortaq

/ Mehdi Shams (atsior.)

[1] Inatsimmi allannguutit § 34, imm. 1.

[2] Inatsimmi allannguutit § 34, imm. 1.

[3] Inatsimmi allannguutit § 7, imm. 1-2, § 7, imm. 3 aamma § 14, imm. 3.

## **Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut